



Theodoricus ex illustri familia comitū in Manderschit apud Belgas natus, & in omni genere uirtutum optimè educatus est. Is cum felici ingenio esset præditus, bonis literis operam dedit, & in ijs plurimum profecit. Huic eruditioni uitæ integritatem & raram prudentiam coniunxit. Itaq; Carolus Imperator hūc Theodoricum plurimum dilexit, & hinc inde ad principes sæpius suum Legatum misit. In ijs locis Theodoricus res sibi commissas singulari faciēdia expediuit, & apud omnes principes sibi magnam auctoritatem ob uirtutes conciliauit. Cum etiam 1541 Ratisbonæ comitia celebrarentur, & doctorum uirorum colloquium institutum esset, ut de controuersis articulis disceptaretur, Carolus hunc Theodoricum actioni eorum testimonij causa interesse iussit, ut principes ea de re postea instrueret. Deinde quoq; 1547 cum Carolus quasi uictor esset, atq; Hermanno Archiepiscopo Coloniensi deposito Adolphum substituisset, nobilitas & ciuitatum legati consentire noluere. Ne itaq; motus aliquis in patria excitaretur, comitijs Coloniæ habitis, Theodoricus ille & Guilielmus Nuenerius comes, totius nobilitatis primi, ad Hermannum missi. Hi pro sua dextertate & gratia persuadent Hermanno, ut misericordia populi suo iuri cedat. Id quod ipse benignè præstitit, & subditis iuramentum remisit. Hoc modo etiam Theodoricus deinceps uixit, & apud omnes Belgas in summa existimatione fuit. Sleid.